



REPUBLIKA E KOSOVËS - REPUBLIKA KOSOVO  
KOMUNA E VUSHTRRIË - OPŠTINA VUČITRN

01 Nr. / Br 276/20

Nr. i fq. / Br. sht - 17 -

Data: / Datum 30. 12. 2020

VUSHTRRI - VUČITRN



**REPUBLIKA E KOSOVËS  
KUVENDI I KOMUNËS-VUSHTRRI**

---

**RREGULLORE  
(KKV) NR.10/2020 PËR REALIZIMIN E TË DREJTAVE,  
PËRKUJDESJEN, MBROJTJEN DHE PARANDALIMIN E PUNËVE TË  
RËNDA PËR FËMIJË**

**Vushtrri dhjetor 2020,**

Bazuar në Konventën mbi të Drejtat e Fëmijës, neni 14 të Ligjit nr. 06/L-084 për Mbrojtjen e Fëmijës, nenin 11 dhe 12, paragrafin 12.2, pika (c) dhe nenin 17 pika (s) të Ligjit nr. 03/L-040 për Vetëqeverisjen Lokale dhe nenit 41 paragrafi 2 shkronja (c) të Statutit të Komunës së Vushtrrisë, Kuvedni I Komunës së Vushtrrisë në mbledhjen e mbajtur më **30 dhjetor 2020**, aprovoi këtë:

**RREGULLORE**  
**PËR REALIZIMIN E TË DREJTAVE, PËRKUJDESJEN, MBROJTJEN DHE**  
**PARANDALIMIN E PUNËVE TË RËNDA PËR FËMIJË**

**Neni 1**  
**Qëllimi**

Qëllimi i kësaj rregulloreje është të përcaktohen rregullat dhe procedurat për realizimin e të drejtave, përkujdesjen dhe mbrojtjen e fëmijëve. Gjithashtu kjo rregullore ka për qëllim eliminimin e punëve të rënda për fëmijë, si dhe përcaktimin e detyrave dhe përgjegjësive të subjekteve për mbrojtjen e fëmijëve, duke i përfshirë edhe fëmijët me nevoja të veçanta në Komunën e Vushtrrisë.

**Neni 2**  
**Fushëveprimtaria**

Dispozitat e kësaj rregulloreje zbatohen vetëm për kategorinë e fëmijëve, të cilët jetojnë dhe veprojnë në territorin e Komunës së Vushtrrisë.

**Neni 3**  
**Përkufizimet**

Në këtë rregullore termat e mëposhtëm kanë këtë kuptim:

1. **“Fëmijë”** nënkupton çdo person nga momenti i lindjes deri në moshën 18 vjeç.
2. **“Fëmija në rrezik”** nënkupton fëmijën, të cilit i mohohen ose i cenohen të drejtat e parashikuara me këtë rregullore.
3. **“Mbrojtja e fëmijës”** nënkupton parandalimin e dhunës, abuzimit, shfrytëzimit dhe neglizhimit të fëmijëve, rrëmbimit, shfrytëzimit seksual, trafikimit, punën e rëndë të fëmijëve, ndëshkimin trupor apo ndonjë formë tjetër që vë në rrezik jetën, sigurinë, shëndetin, edukimin, arsimimin dhe zhvillimin e fëmijës si dhe praktikatat e dëmshme tradicionale (martesat e hershme).
4. **“Punë e rrezikshme për fëmijë”**, nënkupton punën që mund të rezultojë me vdekje, lëndime të lehta dhe të rënda dhe dëmtim të organeve vitale.
5. **“Punë e detyruar”** nënkupton punën ose shërbimet të cilat kërkohen nga fëmija, nën kërcënimin me ndëshkim, përkundër vullnetit të tij.

6. **“Punë e rëndë”**, nënkupton çdo punë fizike, e cila dëmton shëndetin e fëmijës, rrezikon dëmtimin e organeve vitale dhe jetën e fëmijëve.
7. **“Punë e lejuar për fëmijë”**, nënkupton pjesëmarrjen e fëmijëve në aktivitete ekonomike që nuk janë të dëmshme dhe të rrezikshme për zhvillimin dhe shëndetin e fëmijës.
8. **“Kujdesi alternativ”** nënkupton konceptin e qasjes familjare për përkujdesje afatshkurtër dhe afatgjatë të fëmijëve të braktisur dhe fëmijëve që kanë humbur kujdesin prindëror.
9. **“Mekanizmi koordinues”** nënkupton mekanizmin koordinues komunal, i cili vendos prioritetet dhe koordinon punën dhe aktivitetet me organet kompetente të komunës për zbatimin e kësaj rregulloreje.
10. **QKMF**- nënkupton Qendrën Kryesore të Mjekësisë Familjare.
11. **QMF**- nënkupton Qendrën e Mjekësisë Familjare.
12. **AMF**- nënkupton Ambulantat e Mjekësisë Familjare.
13. **Qendra për Punë Sociale/QPS** - është institucion publik profesional, kompetent për koordinimin dhe organizimin e sistemit të integruar të mbrojtjes së fëmijës në kuadër të komunës;
14. **Zyra për Qeverisje të Mirë/ZQM** - nënkupton Zyrën/Njësinë përkatëse për Qeverisje të Mirë në kuadër të Zyrës së Kryeministrit.

#### Neni 4

#### Parimet e përgjithshme për të drejtat e fëmijës

1. Dispozitat e kësaj rregulloreje bazohen në parimet e Konventës mbi të Drejtat e Fëmijës, të cilat të janë:

**1.1. Mosdiskrimini** - nënkupton se të gjithë fëmijët brenda legjislacionit në fuqi i gëzojnë të drejtat e barabarta, pavarësisht racës, ngjyrës, gjinisë, fesë, përkatësisë etnike, sociale, statusit ekonomik të fëmijës, prindërve apo kujdestarit ligjor;

**1.2. Interesat optimale të fëmijës** - nënkuptojnë situatat në të cilat institucionet me prioritet marrin në konsideratë interesat më të mira të fëmijëve;

**1.3. E drejta e jetesës dhe zhvillimit** - nënkupton sigurimin e një jete sa më cilësore për fëmijët, jo vetëm në aspektin fizik, por edhe në atë mendor, emocional, social, kulturor dhe institucional;

**1.4.** Të gjithë përfaqësuesit ligjor dhe subjektet për mbrojtjen e fëmijës në Komunën e Vushtrrisë, duhet të përkujdesen që fëmijët të rriten në mjedis familjar, në një atmosferë lumturie, dashurie dhe mirëkuptimi, ku nuk përdorët ndëshkimi trupor, në mënyrë që të edukohen në frymën e paqes,

të dinjitetit, tolerancës, lirisë, barazisë dhe solidaritetit, dhe fëmijët të përgatiten plotësisht për të bërë një jetë individuale në shoqëri, e cila nxit zhvillimin e potencialit të plotë të fëmijës.

**1.5. Pikëpamjet e fëmijës** - nënkuptojnë lirinë e fëmijëve për t'i shprehur mendimet e tyre mbi çështjet që lidhen me ta, si dhe obligimin e institucioneve për t'i dëgjuar këto mendime dhe për t'i marrë parasysh, gjithmonë në përputhje me nivelin e zhvillimit të fëmijëve.

## **Neni 5** **Obligimet e komunës ndaj fëmijës**

1. Komuna e Vushtrrisë, përkujdeset që në territorin e saj, nga të gjitha subjektet për mbrojtjen e fëmijës dhe në të gjitha fazat, të zbatohen plotësisht, të gjitha të drejtat e fëmijës.
2. Organet dhe administrata komunale si dhe subjektet për mbrojtjen e fëmijës, janë përgjegjës për sigurimin e shërbimeve dhe masave parandaluese, mbrojtëse dhe riintegruese për mbrojtjen e fëmijës në territorin e Komunës. Për këtë qëllim, sipas përgjegjësisive të përcaktuara në Ligj, duhet të:
  - 1.1. marrin hapa për të identifikuar natyrën dhe përmasat e nevojës për mbrojtjen e fëmijës brenda territorit të Komunës;
  - 1.2. zhvillojnë masa për të parandaluar rreziqet që rrezikojnë mirëqenien dhe zhvillimin e fëmijës, nevojën e fëmijës për ndihmë dhe për të zvogëluar problemet ekzistuese;
  - 1.3. zhvillojnë programe dhe projekte për të garantuar të drejtat dhe mirëqenien e fëmijës, për parandalimin dhe reduktimin e faktorëve që vënë në rrezik jetën dhe integritetin moral, fizik, psikologjik e emocional të fëmijës;
  - 1.4. organizojnë takime informuese, promovuese, edukuese dhe trajnuese për mbrojtjen e fëmijës, duke koordinuar dhe harmonizuar veprimet përmes shërbimeve të integruara të sektorëve të edukimit, shërbimeve sociale, shëndetësisë dhe organizatave të tjera qeveritare, joqeveritare dhe komunitetit, për vetëdijesimin e komunitetit dhe arritjen e rezultateve konkrete dhe të sigurta për fëmijët të cilët nuk kanë qasje në shërbimet ekzistuese;
  - 1.5. promovojnë artin, kulturën dhe sportin në institucionet arsimore dhe më gjerë;
  - 1.6. krijojnë një sistem që të jenë më pranë fëmijëve në nevojë dhe sipas nevojë ofrimin e financimit emergjent për fëmijë;
  - 1.7. përkrahin ekzekutimin e masave të diversitetit, masave edukative dhe dënimeve për fëmijë që kanë rënë ndesh me ligjin;
  - 1.8. zhvillojnë praktika të prindësisë së mirë dhe promovimit shëndetësor;
  - 1.9. krijojnë mundësi të barabarta për të gjithë fëmijët për t'u regjistruar në shkollë, për ta vijuar dhe për përfunduar atë;
  - 1.10. inkurajojnë dhe i mbështesin organizatat e të rinjve dhe fëmijëve dhe u ofrojnë mbështetje organizatave të shoqërisë civile, për të zhvilluar kapacitetet e tyre për të ndikuar në vendimmarrjen e pavarur në fushën e të drejtave të fëmijëve;

1.11. komunikojnë dhe mund të krijojnë partneritet me institucionet qendrore dhe organizatat dhe institucionet e pavarura, organizatat e shoqërisë civile, grupet e të rinjve dhe mediat për t'i promovuar të drejtat e fëmijëve, në mënyrë që në komunë të sigurohet një mjedis i sigurt për fëmijët.

3. Subjektet për mbrojtjen e fëmijës, kryejnë shërbime sociale dhe familjare brenda territorit të Komunës, sipas përgjegjësive të përcaktuara në Ligjin për shërbime sociale dhe familjare, standardeve të specifikuar nga Ministria dhe me legjislacionin përkatës në fuqi.

## **Neni 6**

### **Përgjegjësia prindërore dhe familjare për përkujdesjen për fëmijën**

1. Mbrojtja kryesore e të drejtave të fëmijës nis në familje, nga prindërit ose kujdestarët.
2. Interesi më i mirë i fëmijës përmbushet kur nevojat e zhvillimit të tij fizik dhe psikologjik, plotësohen brenda kontekstit të familjes së tij biologjike. Të gjithë subjektet duhet të bëjnë çdo përpjekje të promovojnë, mirëqenien e fëmijës në suaza të familjeve të tyre biologjike përmes ofrimit të përkujdesjes, mbrojtjes dhe këshillimit social dhe në raste të jashtëzakonshme, asistencës materiale.
3. Familja, ka përgjegjësi primare për rritjen, mirëqenien, edukimin dhe mbrojtjen e fëmijës. Përfaqësuesit ligjor dhe anëtarët e tjerë të familjes janë përgjegjës për mbrojtjen e fëmijës nga të gjitha aktet dhe situatat që e vënë fëmijën në rrezik, nga të gjitha format e dhunës fizike dhe mendore, neglizhimit, abuzimit, keqtrajtimit, dhe shfrytëzimit dhe përgjegjësitë tjera të përcaktuara në Ligj.
4. Përfaqësuesit ligjor janë të obliguar në radhë të parë të përkujdesen për sigurimin e të drejtave dhe detyrave që kanë për qëllim sigurimin e mirëqenies emocionale, sociale dhe materiale të fëmijës, duke u kujdesur dhe mbajtur raporte vetanake me fëmijën dhe obligimin për t'i siguruar fëmijës jetën, sigurinë, shëndetin, mirërritjen, edukimin, arsimimin, përfaqësimin ligjor dhe administrimin e pasurisë së fëmijës.
5. Organet dhe administrata komunale dhe profesionistët për mbrojtjen e fëmijës, në të gjitha veprimet dhe vendimet, që kanë të bëjnë me fëmijën duhet të ndërmarrin të gjitha masat e nevojshme për të siguruar integrimin e fëmijës në familje dhe shoqëri dhe të bëjnë çdo përpjekje të promovojnë, mirëqenien e fëmijës në suaza të familjeve të tyre biologjike përmes ofrimit të përkujdesjes, mbrojtjes dhe këshillimit social dhe në raste të jashtëzakonshme, asistencës materiale.

6. Fëmija mund të largohet nga kujdesi i përfaqësuesit ligjor, vetëm në rastet siç përcaktohet me legjislacion në fuqi.

## **Neni 7**

### **Përgjegjësitë për realizimin e të drejtave të fëmijëve**

1. Realizimi i të drejtave të fëmijëve është përgjegjësi kryesore e familjes dhe institucioneve të komunës.

2. Institucionet e komunës, të cilat janë kompetente në fushën e të drejtave të fëmijëve, kanë përgjegjësi ligjore dhe sociale për mbrojtjen dhe promovimin e të drejtave të fëmijëve, si dhe parandalimin dhe eliminimin e punëve të rënda dhe të rrezikshme.

3. Fëmijët i gëzojnë të gjitha të drejtat ashtu siç janë përcaktuar sipas Konventes Mbi të Drejtat e Fëmijës.

4. Fëmijët janë kategori e veçantë e personave, të cilët për shkak të moshës, zhvillimit fizik, intelektual dhe pjekurisë duhet t'i realizojnë të drejtat e tyre me mbështetjen e të rriturve.

5. Prindërit, familjet, kujdestarët dhe institucionet e qeverisjes lokale mbajnë përgjegjësi për realizimin e të drejtave të fëmijëve, për të siguruar ruajtje dhe kujdes të veçantë.

6. Institucionet përgjegjëse për mbrojtjen dhe promovimin e të drejtave të fëmijës në komunë janë:

6.1. Kuvendi i Komunës;

6.2. Kryetari i Komunës;

6.3. Drejtoria për Arsim;

6.4. Drejtoria e Shëndetsisë dhe Përkujdesjes Sociale;

6.5. Zyra për të drejtat e njeriut në komunë;

6.6. Qendra për Punë Sociale, institucionet e drejtësisë;

6.7. Institucionet shëndetësore QKMF, QMF, AMF;

6.8. Këshillat e fshatrave dhe lagjeve urbane, dhe

6.9. Këshilli lokal i prindërve.

## **Neni 8**

### **Masat e përgjithshme për mbrojtjen e fëmijës**

1. Masat e përgjithshme për mbrojtjen e fëmijës janë:
  - 1.1. Parandalimi;
  - 1.2. Masat e mbrojtjes ligjore;
  - 1.3. Detyrimi ligjor për raportim;
  - 1.4. Ndarja e fëmijës nga familja;
  - 1.5. Mbrojtja e fëmijës pa përkujdesje prindërore;
  - 1.6. Mbrojtja e fëmijës gjatë qëndrimit në strehim familjar;
  - 1.7. Shtëpitë për mbrojtjen e fëmijës;
  - 1.8. Monitorimi i masave të mbrojtjes dhe
  - 1.9. Masat për aftësim prindëror.

## **Neni 9**

### **Format specifike të mbrojtjes së fëmijës**

1. Format specifike të mbrojtjes së fëmijës janë:
  - 1.1 Mbrojtja e fëmijës nga pornografia;
  - 1.2 Masat kundër faqeve të internetit me përmbajtje pornografike dhe të atyre që dëmtojnë shëndetin dhe jetën e fëmijës;
  - 1.3 Kapaciteti i fëmijës për të ndërmarë veprime ligjore;
  - 1.4 Drejtësia ndaj fëmijës;
  - 1.5 Ndihma juridike dhe qasja në organet e drejtësisë;
  - 1.6 Ndihma mjekësore dhe psikologjike, rehabilitimi dhe masat për riintegrim;
  - 1.7 Personat e dënuar për abuzim seksual apo shfrytëzim të fëmijës;
  - 1.8 Pjesëmarrja e fëmijës në konfliktin e armatosur, dhe

1.9 Mbrojtja e fëmijës të prekuar nga konflikti i armatosur dhe mbrojtja e fëmijës së zhvendosur brenda shtetit.

## **Neni 10**

### **Punët dhe aktivitetet e ndaluara për fëmijë**

1. Me qëllim të parandalimit të rrezikimit dhe ruajtjes së shëndetit të fëmijëve, ndalohen këto lloje të punëve:

1.1 Puna e natës për fëmijë, nga ora 20:00-06:00;

1.2 Ngritja dhe bartja e peshave të rënda mbi 15 kg për meshkuj dhe mbi 10 kg për femra;

1.3 Puna e fëmijës që kërkon ekuilibër të veçantë;

1.4 Puna e fëmijës nën sipërfaqe të tokës, nën ujë, në vendet e mbyllura dhe lartësi mbi 2m;

1.5 Puna e fëmijës që shkakton dëme në shëndetin e tyre për shkak të ekspozimit ndaj temperaturave të larta apo të ulëta, ose ndaj zhurmës dhe dridhjes;

1.6 Puna e fëmijës që përfshinë ekspozim ndaj substancave biologjike, kimike, fizike dhe toksike, të cilat paraqesin rrezik për shëndetin e tyre, si dhe puna e fëmijëve që i ekspozohet radioaktivitetit;

1.7 Puna e fëmijës në sektorin e bujqësisë, blegtorisë dhe pylltarisë, ku përfshihen operimi me makina bujqësore, spërkatja me pesticide, punë të rënda fizike në fusha, prerja e drunjve dhe puna në thertore, therja, bartja dhe shitja e kafshëve;

1.8 Punët në rrugë, ku përfshihen: bartja e mallvare, ngritja hidraulike e mjeteve motorike, bartja e mallrave me karrocë, kërkim-lëmosha;

1.9 Puna e fëmijëve në gjermimin, grumbullimin dhe bartjen e mbeturinave;

1.10 Puna e fëmijës në eksportimin e pasurive natyrore, dhe

1.11 Fëmija nën moshën 18 vjeç nuk mund të punojë punë të rrezikshme.

2. Aktivitetet e ndaluara për fëmijë janë:

2.1. Frekuentimi i fëmijës në klubet e natës;

2.2 Frekuentimi në lokalet e lojërave të fatit;

2.3 Qasja në lojërat e fatit online, dhe

2.4 Frekuentimi në qendrat argëtuese për të rritur dhe të ngjashme;



3. Organi Komunal obligohet që t'ia paraqes kërkesën me shkrim operatorit të ndonjë ngjarjeje publike për të kufizuar qasjen për fëmijët nën moshën 18 vjeçare.

### **Neni 11**

#### **Monitorimi i punëve për fëmijë**

Me qëllim të monitorimit të punëve të fëmijëve, mekanizmi koordinues bën: identifikimin, vlerësimin, tërheqjen, mbrojtjen, prarandalimin, verifikimin dhe përcjelljen, në mënyrë që të parandalohen dhe eliminohen punët e rënda të fëmijëve konform kësaj rregulloreje.

### **Neni 12**

#### **Puna dhe angazhimi përjashtimisht i lejuar**

1. Secila punë e fëmijës e paguar, punë vullnetare, punë si pjesë e praktikës profesionale apo çdo lloj angazhimi tjetër i fëmijës mund të lejohet vetëm nën mbikëqyrjen e rregullt dhe pasi që të evidentohen të gjitha rreziqet potenciale, si dhe të jenë të planifikuara masat për kontrollimin e rreziqeve të mundshme, të cilave mund t'u ekspozohet fëmija.
2. Marrëdhënia e punës mund të themelohet (lidhë kontratë pune) me fëmijën nga 15 vjeç deri në 18 vjeç.
3. Në rastet sipas paragrafit 2 fëmijët mund të punësohen vetëm në aktivitete ekonomike që nuk janë të dëmshme për zhvillimin dhe shëndetin e tyre, veçanërisht ato të cilat nuk pengojnë që të vijojnë shkollimin dhe shfrytëzimin e kohës së tyre të lirë.

### **Neni 13**

#### **Qeverisja lokale dhe të drejtat e fëmijëve**

1. Komuna bën vlerësimin e ndikimit të politikave, strategjive, planeve të veprimit dhe programeve për të drejtat e fëmijëve.
2. Mekanizmi koordinues kryen vlerësime të rregullta lidhur me ndikimin e qeverisjes lokale për realizimin e të drejtave të fëmijëve.

### **Neni 14**

#### **Detyrimi i raportimit për dhunën ndaj fëmijës**

1. Subjektet për mbrojtjen e fëmijës dhe çdo person që punonë me dhe për fëmijët dhe çdo pjesëtar i profesionit të mësuesisë, infermierisë, mjekësisë, stomatologjisë, psikologjisë ose i policisë apo profesionist tjetër që ka për detyrë përkujdesjen për fëmijët, i cili dyshon ose ka dëshmi se që ndaj fëmijës, qoftë nga ana e prindit ose përkujdesësit të tij apo nga cilido person, është ushtruar çdo formë e dhunës fizike ose mendore, keqtrajtimi, braktisja, abuzimi, neglizhimi dhe shfrytëzimi

është i obliguar që të raportojë rastin, me shkrim ose gojarisht në Polici ose në Qendrën për Punë Sociale ose tek mbrojtësi i viktimave, në pajtim me legjislacionin në fuqi që rregullon këtë çështje.

2. Detyra dhe mënyra e raportimit të dhunës ndaj fëmijës duhet të jenë pjesë e programeve të rregullta të trajnimeve, kur përgatiten profesionistët e ardhshëm që do të punojnë me dhe për fëmijët. Kjo duhet të bëhet edhe përmes fushatave të ndryshme promovuese duke përfshirë edhe udhëzimet përkatëse për mënyrën dhe vendin e raportimit.

3. Pamundësia e subjekteve dhe personave të përcaktuara në paragrafin 1 të këtij neni, për të raportuar, sanksionohet sipas ligjit në fuqi.

## **Neni 15**

### **Mekanizmat për mbrojtje të fëmijës**

1. Mekanizmat për mbrojtje të fëmijës, përgjegjëse për zbatimin e kësaj rregulloreje, janë:

- 1.1. Kryetari i komunës;
- 1.2. Drejtoritë dhe njësitë përkatëse komunale sipas fushës që mbulojnë në lidhje me të drejtat e fëmijës;
- 1.3. Qendra për Punë Sociale;
- 1.4. Ekipi për të Drejtat e Fëmijës;
- 1.5. Njësia/Zyrtari përkatës për mbrojtjen e fëmijës;
- 1.6. Institucionet shëndetësore;
- 1.7. Institucionet arsimore publike dhe jopublike në nivelet arsimore parashkollore, fillore, të mesëm të ulët, të mesëm të lartë dhe të lartë;
- 1.8. Organizatat e shoqërisë civile (organizatave joqeveritare, shoqatat, klubet dhe organizatat formale dhe joformale);
- 1.9. Familjet strehuese për fëmijët pa përkujdesje prindërore;
- 1.10. Shtëpitë për mbrojtjen e fëmijës dhe
- 1.11. Subjektet tjera që kanë përgjegjësitë me legjislacionin përkatës në fuqi.

## **Neni 16**

### **Roli i Qendrës për Punë Sociale**

1. Qendra për Punë Sociale, ofron përkujdesje sociale dhe/ose këshillim në rrethanat kur një fëmijë është në nevojë për shërbime sociale dhe familjare dhe duhet të marrë çdo hap të nevojshëm për ruajtjen e sigurisë së fëmijës dhe siguron që shërbimet e ofruara janë në përputhje me përgjegjësitë që përmban Ligji për shërbime sociale dhe familjare, Ligji dhe legjislacioni përkatës në fuqi.

2. Qendra për Punë Sociale identifikon rastet e fëmijëve që janë në situatë rreziku apo në nevojë dhe ndërhyr për menaxhimin e rastit, së bashku me subjektet përkatëse deri në zgjidhjen përfundimtare.

3. Qendra për Punë Sociale sipas përgjegjësisve të përcaktuara në Nenin 15 të Ligjit duhet që të:
  - 3.1. koordinojë dhe organizojë sistemin e integruar të mbrojtjes së fëmijës në kuadër të komunës;
  - 3.2. zbatojë politikat nacionale dhe lokale për mbrojtjen e fëmijës, duke përfshirë zbatimin e ndërhyrjeve dhe marrjen e masave për parandalimin dhe mbrojtjen e fëmijës nga abuzimi, neglizhimi, keqtrajtimi dhe dhuna;
  - 3.3. shërbejë si qendër informacioni, ku fëmijët dhe familjet në kuadër të komunës, mund të informohen apo të referohen te shërbimet apo institucionet e tjera mbështetëse, sipas nevojave që ata kanë;
  - 3.4. përcaktojë së paku një (1) zyrtar përkatës përgjegjës dhe të specializuar për të koordinuar masat dhe ndërhyrjet për mbrojtjen e fëmijës;
  - 3.5. Ushtron çdo kompetencë tjetër, në përmbushjen e mandatit që ka, sipas legjislacionit në fuqi.
4. Qendra për Punë Sociale mobilizon të gjitha subjektet për mbrojtjen e fëmijës për funksionalizuar sistemin e integruar të mbrojtjes së fëmijës.

### **Neni 17**

#### **Caktimi i Njesisë/Zyrtarit për mbrojtjen e fëmijës**

1. Kryetari, me qëllim të përmirësimit dhe mbrojtjes së të drejtave të fëmijës si dhe të kryerjes së detyrave dhe përgjegjësisve të përcaktuara me Ligj dhe këtë Rregullore, sipas vlerësimit të nevojave specifike të komunës, cakton Njësinë/Zyrtarin përkatës për mbrojtjen e fëmijës, nga radhët e punonjësve të QPS-së .
2. Kryetari, siguron që të ndahen burime të mjaftueshme nga buxheti për kryerjen e detyrave të Njesisë apo zyrtarit përkatës për mbrojtjen e fëmijës.
3. Njësia apo zyrtari përkatës për mbrojtjen e fëmijës i jep llogari:
  - 3.1. Kryetarit, për koordinimin dhe raportimin lidhur me zbatimin e Ligjit për mbrojtjen e fëmijës dhe
  - 3.2. Drejtorit të QPS-së, për mbajtjen në nivel të standardeve të praktikës profesionale dhe ushtrimin e kompetencave dhe përgjegjësisve të përcaktuara me Ligj dhe me këtë rregullore.
4. Kryetari, në afat prej më së largu tre (3) muajsh pas hyrjes në fuqi të kësaj rregulloreje, cakton njësinë apo zyrtarin/ët përkatës për mbrojtjen e fëmijës.

### **Neni 18**

#### **Detyrat dhe përgjegjësitë e Njesisë apo Zyrtarit përkatës për mbrojtjen e fëmijës**

1. Njësia apo Zyrtari përkatës për mbrojtjen e fëmijës, në kuadër të komunës, ka përgjegjësitë si në vijim:

- 1.1. bashkëpunon, koordinon, monitoron, raporton, mbron, promovon zbatimin e Ligjit;
- 1.2. ofron mbështetje në hartimin dhe zbatimin e politikave dhe planeve lokale për promovimin e të drejtave të fëmijës dhe mbrojtjen e fëmijës;
- 1.3. mbështetë dhe promovon praktikat e mira dhe ndihmon në ngritjen e kapaciteteve të komunës për përkujdesjen dhe mbrojtjen e fëmijëve;
- 1.4. informon dhe udhëzon, në formën verbale apo të shkruar, për të drejtat e fëmijës dhe për mjetet ligjore të disponueshme për mbrojtjen e fëmijës, për të gjithë punonjësit dhe personat të komunës;
- 1.5. bashkëpunon dhe kryej detyrat dhe përgjegjësitë e veta në bashkërendim dhe koordinim me ZQM-në si dhe me institucionet tjera kompetente sipas Ligjit;
- 1.6. prezanton një raport vjetor tek ZQM-ja sipas formatit të përcaktuar nga ajo për zbatimin e Ligjit në kuadër të komunës, duke përfshirë edhe raportin për zbatimin e Konventës pranë Komitetit për të drejtat e fëmijës në Gjenevë;
- 1.7. bashkëpunon dhe mbështetë ZQM-në dhe institucionet përkatëse në hartimin e planeve relevante të veprimit lidhur me zbatimin e legjislacionit në fuqi për mbrojtjen e fëmijës;
- 1.8. bashkëpunon me Komitetin Ndërmintor për të Drejtat e Fëmijës për zhvillimin e politikave që kanë të bëjnë me të drejtat dhe mbrojtjen e fëmijës, zbaton rekomandimet e Komitetit, ofron të dhënat e kërkuara nga ZQM në emër të Komitetit, si dhe marrin pjesë në takimet e Komitetit, sipas ftesës dhe agjendës përkatëse;
- 1.9. mbledh të dhëna statistikore lidhur me rastet e diskriminimit të fëmijës, si dhe të dhëna tjera për fëmijët në territorin e komunës;
- 1.10. zhvillon aktivitete ndërgjegjësimi dhe edukimi lidhur me promovimin e Ligjit, si dhe të kryejë hulumtime, sondazhe në çështjet e të drejtave të fëmijës;
- 1.11. publikon raporte dhe bën rekomandime për të vepruar në mbrojtjen dhe promovimin e të drejtave të fëmijëve, në mënyrë që institucionet përkatëse t'i shfrytëzojnë raportet dhe rekomandimet për të zhvilluar politika, plane të veprimit dhe buxhetin për fëmijë;
- 1.12. shkëmben dhe siguron informata për Avokatin e Popullit, për çështjet që kanë të bëjnë me mbrojtjen e fëmijës dhe ato që u përkasin rekomandimeve të Avokatit të Popullit;
- 1.13. merr pjesë, sipas ftesës, në takimet e Këshillit të Drejtorëve të komunës dhe paraqet raportin, duke përshkruar në detaje punët e kryera për të cilat është përgjegjëse;
- 1.14. përgatit vetëvlerësimet periodike, të cilat rezultojnë me veprime dhe politika që duhet të ndërmerren nga Komuna, në mënyrë që të krijohet një Komunë mike ndaj fëmijës;
- 1.15. siguron sistem komunikimi që mundëson shkëmbimin e informacionit ndërmjet institucioneve të komunës dhe institucioneve qendrore;

- 1.16. siguron sistem komunikimi që mundëson shprehjen e mendimeve të fëmijëve, me pjesëmarrjen e fëmijëve, të cilat përfshihen në punën e qeverisjes në nivel komunal;
  - 1.17. bashkëpunon dhe koordinon mekanizmat në territorin e komunës që merren me mbrojtjen dhe të drejtat e fëmijëve;
  - 1.18. Përcakton treguesit dhe të dhënat për fëmijët dhe interesat e tyre, sipas prioriteteve të Komunës;
  - 1.19. bashkëpunon me tryeza multidisiplinare për ndihmë në menaxhimin e rastit.
  - 1.20. bashkëpunon me Ekipin për të Drejtat e Fëmijës për zbatimin e planit për aftësimin prindëror dhe për çështjet tjera të ndërlidhura sipas legjislacionit në fuqi.
2. Administrata komunale, organet komunale dhe profesionistët për mbrojtjen e fëmijës, bashkëpunojnë dhe bashkërendojnë aktivitetet e tyre me Njësinë apo Zyrtarin përkatës për mbrojtje të fëmijës, për të koordinuar dhe raportuar zbatimin e Ligjit.

## **Neni 19**

### **Ekipi për të drejtat e fëmijës**

1. Ekipi për të Drejtat e Fëmijës në nivel të vendimmarrjes politike në kuadër të komunës, ka përgjegjësitë e përcaktuara në Nenin 20 të Ligjit për mbrojtjen e fëmijës, që përcaktojnë:
- 1.1. definimin e prioriteteve të komunës dhe masave të nevojshme që duhet ndërmarrë për përmirësimin e situatës së tanishme në lidhje me të drejtat dhe mbrojtjen e fëmijës dhe të koordinojë aktivitetet e nevojshme për zbatimin e tyre;
  - 1.2. koordinon dhe monitoron zbatimin e politikave dhe të masave përkatëse për zbatimin e Ligjit për mbrojtjen e fëmijës;
  - 1.3. kujdeset për zbatimin e rekomandimeve dhe vendimeve të nxjerra nga strukturat e parapara për mbrojtjen e fëmijës sipas Ligjit për mbrojtjen e fëmijës;
  - 1.4. vlerëson dhe siguron përputhshmërinë e politikave, akteve juridike dhe masave të tjera të ndërmarra nga Komuna me legjislacionin, politikën, Strategjinë për të Drejtat e Fëmijës dhe standardet ndërkombëtare për të drejtat dhe mbrojtjen e fëmijës;
  - 1.5. zhvillimi i programeve, për të parandaluar përfshirjen e fëmijës në fenomene të mundshme negative dhe ulur faktorët e rrezikut që mund të rrezikojnë fëmijët;
  - 1.6. rekomandon kryetarin e komunës për ndërmarrjen e veprimeve të mëtejme, të nevojshme për të realizuar të drejtat dhe sigurimin e mbrojtjes së fëmijës në pajtim me legjislacionin në fuqi;
2. Mënyra e themelimit dhe funksionimit të Ekipit për të drejtat e fëmijës rregullohet sipas aktit nënligjor të miratuar nga Qeveria.
3. Kryetari nxjerrë vendime përkatëse dhe krijon kushtet e nevojshme Ekipit për të Drejtat e Fëmijës, për kryerjen e funksionit sipas Ligjit dhe aktit nënligjor të nxjerrë nga Qeveria dhe sipas nevojës Rregullores që do të miratohet në Kuvend.

## Neni 20

### Familjet strehuese për fëmijët pa përkujdesje prindërore

1. Drejtori i Drejtorisë përkatëse për Shëndetësi dhe Mirëqenie Sociale obligohet që të sigurojë që në territorin apo për territorin e Komunës të ketë së paku tri (3) familje strehuese për fëmijët pa përkujdesje prindërore, të vlerësuara, trajnuara dhe të aprovuara sipas standardeve të përcaktuara nga Ministria.
2. Ministria dhe Komuna i ofrojnë mbështetje materiale familjes strehuese për përkujdesje për fëmijën gjatë qëndrimit në strehim familjar, në pajtim me legjislacionin dhe standardet përkatëse në fuqi.
3. Familja strehuese nuk lejohet të ndaj asnjë informatë me personat e paautorizuar, mediat dhe të tjerët lidhur me fëmijën gjatë qëndrimit dhe pas largimit nga qëndrimi në strehim familjar.

## Neni 21

### Shtëpitë për mbrojtjen e fëmijës

Shtëpitë për mbrojtjen e fëmijës themelohen nga Ministria pranë Qendrave për Punë Sociale ku funksionojnë gjykatat dhe prokuroritë themelore sipas standardeve të përcaktuara nga ministria dhe aktit nënligjor të miratuar nga qeveria.

## Neni 22

### Asambleja Komunale e Fëmijëve

1. Asambleja Komunale e Fëmijëve përfaqëson në mënyrë të drejtpërdrejtë opinionet dhe pozitën e të gjithë fëmijëve në Komunë dhe ka përgjegjësitë si në vijim:
  - 1.1. siguron pjesëmarrjen e fëmijës për të pasqyruar në mënyrë të drejtë opinionet dhe qëndrimet e fëmijës, karshi moshës dhe pjekurisë së tyre, në zhvillimin dhe realizimin e veprimeve në fushën e arsimit, shkencës, kulturës, sportit, punës humanitare dhe aktiviteteve të tjera me interes për fëmijët dhe komunitetin;
  - 1.2. avokon tek institucionet përkatëse për të drejtat e fëmijës dhe për çështjet e ngritura nga vetë fëmijët në nivel lokal;
  - 1.3. bashkëpunon me këshillat drejtues të shkollave, këshillat e prindërve, këshillat e nxënësve dhe komunitetin lokal;
  - 1.4. zhvillon dhe bashkëpunon me mekanizmat dhe organizatat tjera;
  - 1.5. ndihmon në ngritjen e vetëdijes për të drejtat e fëmijës, përgjegjësitë dhe gjithë përfshirja e interesave të fëmijëve/nxënësve;
  - 1.6. organizon aktivitete të identifikuara nga vetë fëmijët, dhe ato që kanë të bëjnë me të drejtat e fëmijës;

- 1.7. inkurajon frymën e paqes, të dinjitetit, tolerancës, lirisë, barazisë dhe solidaritetit, në shoqëri dhe tek fëmijët;
  - 1.8. promovon vlerat shoqërore dhe nxitë ndjenjën për t'u marrë në të ardhmen me aktivitete institucionale dhe politike;
  - 1.9. siguron bashkëpunimin e nxënësve dhe mësuesve, edukatorëve dhe bashkëpunëtorëve profesionalë;
  - 1.10. informon nxënësit rreth çështjeve me rëndësi të veçantë për ta;
2. Asambleja Komunale e Fëmijëve do të funksionojë sipas Rregullores që do të miratohet në Kuvend.

### **Neni 23**

#### **Bashkëpunimi ndër-komunal**

1. Për ushtrimin më efikas dhe më efektiv të mbrojtjes së fëmijës, komuna ka të drejtë të hyjnë në marrëdhënie bashkëpunimi me dy apo më shumë komuna të Republikës së Kosovës në pajtim me format, kushtet dhe procedurat e përcaktuara me Ligjin për bashkëpunim ndërkomunal.
2. Nismat për vendosjen e bashkëpunimit ndër-komunal nga paragrafi 1 i këtij neni, të ndërmarra nga palët me të drejtë nisme, Kryetari, 1/3 e anëtarëve të Kuvendit, së paku 5 % e qytetarëve të komunës me të drejtë vote apo nga Qeveria, merren me prioritet nga administrata dhe organet komunale.
3. Dispozitat e Ligjit për bashkëpunim ndërkomunal vlejné edhe për të gjitha format e bashkëpunimit ndër-komunal për mbrojtjen e fëmijës. Këto marrëveshje nënshkruhen nga kryetarët dhe miratohen nga kuvendet komunale që janë pjesëmarrëse në bashkëpunimin ndër-komunal. Marrëveshja e bashkëpunimit ndër-komunal bëhet e plotfuqishme pas vlerësimit të ligjshmërisë së saj nga Ministria përgjegjëse për qeverisje lokale dhe publikimit të marrëveshjes në Gazetën Zyrtare.

### **Neni 24**

#### **Bashkëpunimi me organizatat joqeveritare për mbrojtjen e fëmijës**

1. Organet dhe administrata komunale:
  - 1.1. bashkëpunojnë me organizatat joqeveritare për realizimin e politikave për të drejtat e fëmijës, si dhe për ofrimin e shërbimeve të nevojshme për mbrojtjen e tyre, në pajtim me këtë rregullore dhe aktin nënligjor të përcaktuar nga Qeveria;
  - 1.2. sigurojnë, inkurajojnë dhe mbështesin pjesëmarrjen e organizatave joqeveritare në çështjet e mbrojtjes e fëmijës dhe në aktivitetet planifikuese dhe zbatuese si dhe u ofrojnë këshilla dhe udhëzime organizatave që kërkojnë të ndërmarrin aktivitete të tilla.

- 1.3. Mbajnë komunikime të rregullta me organizatat e shoqërisë civile në mënyrë që të sigurohet një situatë e qartë e fëmijëve në komunë nga një perspektivë tjetër.
2. Organizatat joqeveritare të licencuara nga Ministria, sigurojnë shërbimet përkatëse të nevojshme për mbrojtjen e fëmijës, qoftë me nismën e tyre ose me kontratë.
3. Administrata dhe Organet komunale mund të hyjnë në kontrata me organizatat joqeveritare për ofrimin e shërbimeve të veçanta sociale dhe familjare brenda territorit të tyre. Kontratat e tilla duhet të jenë në pajtim me planet vjetore të komunës për shërbime sociale dhe familjare në territorin e saj.

## **Neni 25**

### **Themelimi i tryezave multidisiplinare për ndihmë në menaxhimin e rastit**

Tryezat multidisiplinare për ndihmë në menaxhimin e rasteve themelohen në nivel profesionistësh, dhe veprojnë mbi bazën e procedurave të detajuara në pajtim me aktin nënligjor që aprovohet nga Qeveria.

## **Neni 26**

### **Buxhetimi për realizimin e të drejtave të fëmijëve dhe parandalimin nga punët e rënda**

Kuvendi i Komunës në baza periodike ndan mjete financiare (buxhetim) për realizimin e aktiviteteve dhe projekteve që i dedikohen fëmijëve.

## **Neni 27**

### **Promovimi i të drejtave të fëmijëve**

1. Komuna përmes mekanizmit koordinues ndërmerri masa konkrete për promovimin dhe respektimin e të drejtave të fëmijëve, si dhe mbrojtjen e tyre nga punët e rënda dhe të rrezikshme.
2. Masat për promovimin e të drejtave të fëmijëve realizohen përmes organizmit të trajnimeve dhe tryezave mbi të drejtat e fëmijëve, për udhëheqësit dhe zyrtarët kompetent të komunës.
3. Me qëllim të promovimit të të drejtave të fëmijëve, komuna krijon partneritete me institucionet qendrore dhe me organizatat e shoqërisë civile, grupet e të rinjve dhe mediat.

## **Neni 28**

### **Përkrahja dhe sensibilizimi nga institucionet e komunës për të drejtat e fëmijëve**

1. Komuna ndërton partneritet me organizatat e shoqërisë civile dhe institucionet tjera të pavarura, me qëllim të përkrahjes dhe promovimit të të drejtave të fëmijëve.
2. Komuna mbështet organizatat e shoqërisë civile për të zhvilluar kapacitetet e tyre në mënyrë që të ndikojnë sa më shumë në fushën e realizimit të të drejtave të fëmijëve.



3. Komuna mban komunikime të rregullta me organizatat e shoqërisë civile dhe institucionet tjera të pavarura në mënyrë që të sigurohet një pasqyrë reale mbi gjendjen e realizimit të të drejtave të fëmijëve.

4. Me moton "Fëmijët krenaria jonë", komuna organizon manifestim disaditor, dedikuar promovimit të të drejtave të tyre.

### **Neni 29**

#### **Pjesëmarrja e fëmijëve në jetën publike**

1. Organet kompetente të komunës krijojnë hapësirë të mjaftueshme për prezencën e fëmijëve, me sa vijon:

1.1 Mundësimin e themelimit të Asamblesë së Fëmijëve, e cila aprovon aktet e nevojshme për funksionimin e saj;

1.2. Mundësinë e pjesëmarrjes në mënyrë të organizuar të fëmijëve në aktivitete të ndryshme, të cilat realizohen nga institucionet komunale;

1.3. Krijimin e mundësisë për pjesëmarrjen e fëmijëve në ambientin e punës në zyret e institucioneve komunale.

### **Neni 30**

#### **Procedurat për zbatimin e kësaj rregulloreje**

1. Mekanizmi koordinues monitoron zbatimin e kësaj rregulloreje dhe harton raporte periodike për nivelin e zbatimit të saj.

2. Kuvendi i komunës shqyrton dhe miraton raportin vjetor të mekanizimit koordinues për nivelin e zbatimit të rregullores dhe në rast të moszbatimit të saj, merr vendime dhe nxjerr rekomandime për sigurimin e zbatimit të saj të plotë.

3. Kryetari i komunës brenda tre (3) muajve nga hyrja në fuqi e kësaj rregulloreje, nxjerr vendimet e nevojshme për ta implemetuar në tërësi rregulloren në fjalë.

### **Neni 31**

#### **Rastet e shkeljeve të të drejtave të fëmijëve**

Në rastet kur cenohen të drejtat e fëmijëve, të garantuara dhe të mbrojtura me legjislacionin në fuqi, shkelësit e tyre do të ndëshkohen për kundërvajtje konform nenit 62 të Ligjit për mbrojtjen e fëmijës.

**Neni 32**  
**Shfuqizimi**

Me hyrjen në fuqi të kësaj Rregulloreje, shfuqizohet Rregullorja (KKV) nr. 03/2019 për realizimin e të drejtave, mbrojtjen dhe parandalimin e punëve të rënda për fëmijë Nr. 328/19 e datës 27.11.2019.

**Neni 33**  
**Hyrja në fuqi**

Kjo rregullore hyn në fuqi pesëmbëdhjetë (15) ditë pas regjistrimit në Zyrën e Protokollit të Ministrisë për Administrimin e Pushtetit Lokal, si dhe shtatë (7) ditë pas publikimit në faqen zyrtare të Komunës së Vushtrrisë.

  
Nasuf Aliu  
  
Kryesues i Kuvendit